

Adabi oblačenja

[Bosanski – Bosnian – بوسني]

Muhammed b. Ibrahim et-Tuvejdžiri

Prijevod:

Hakija Kanurić

Revizija:

Ersan Grahovac

2014 - 1435

IslamHouse.com

﴿ آداب اللباس ﴾

« باللغة البوسنية »

محمد بن إبراهيم التويجري

ترجمة:

هاكيا كانوريتش

مراجعة:

أرسان غراهوفاتس

2014 - 1435

IslamHouse.com

Adabi oblačenja

Koristi odjeće

Prva: Ukras i pokrivanje stidnog mjesta, kao što je rekao Uzvišeni Allah: ***O sinovi Ademovi, dali smo vam odjeću koja će pokrivati stidna mjesta vaša, a i raskošna odijela, ali, odjeća čestitosti, to je ono najbolje. - To su neki Allahovi dokazi da bi se oni opametili.*** (El-A'raf, 26.)

Druga: Štiti čovjeka od onog što mu šteti, kao što je rekao Uzvišeni Allah: ***Od onoga što je stvorio - Allah vam hlad daje i skloništa u brdima vam daje i odjeću koja vas čuva od vrućine; daje vam i oklope koji vas u borbi štite; i tako vam upotpunjava blagodat Svoju da biste bili poslušni.*** (En-Nahl, 81.)

Najbolja odjeća

1. Enes ibn Malik, radijallahu anhu, prenosi da je Allahovom Poslaniku, sallallahu alejhi ve sellem, najdraže bilo obući ogrtač . (Muttefekun alejhi)¹
2. Ibn Abbas, radijallahu anhu, prenosi da je Poslanik, sallallahu alejhi ve sellem, rekao: „**Od vaše odjeće oblačite bijelo, jer to vam je najbolja odjeća, i vaše**

¹ Bilježi Buharija, br. 5813., i ovo je njegova verzija, i Muslim, br. 2079.

umrle u bijele kefine umotavajte.“ (Bilježi Ebu Davud i ibn Medže)²

3. Ummu Seleme, radijallahu anhu, prenosi da je Allahovom Poslaniku, sallallahu alejhi ve sellem, najdraža odjeća bila duga košulja. (Bilježi Ebu Davud i Tirmizi)³

Dužina donjeg dijela odjeće kod muškarca i žene

1. Ebu Seid el-Hudri, radijallahu anhu, prenosi da je Allahov Poslanik, sallallahu alejhi ve sellem, rekao: **„Donji ogrtač muslimana je do polovice nožnog lista i nema smetnje u onom što je između toga i članaka, a šta bude ispod članaka to je u Vatri. Ko iz oholosti pust da mu se odjeća vuče Allah ga neće pogledati.**“ (Bilježi Ebu Davud i Ibn Madže)⁴
2. Ibn Omer, radijallahu anhu, prenosi da je Poslanik, sallallahu alejhi ve sellem, rekao: **„Ko iz oholosti pusti da mu se odjeća vuče Allah u njega neće pogledati na Sudnjem danu.**“ Ummu Seleme, radijallahu anha, upita: **„Kako će žene postupiti sa svojom odjećom koja se vuče iza njih?“** Poslanik,

² Hadis je vjerodostojan, a bilježi ga Ebu Davud, br. 4061., i ovo je njegova verzija, i Ibnu Madže, br. 1472.

³ Hadis je vjerodostojan, a bilježi ga Ebu Davud, br. 4025., i ovo je njegova verzija, i Tirmizi, br. 1764.

⁴ Hadis je vjerodostojan, a bilježi ga Ebu Davud, br. 4093., i ovo je njegova verzija, i Ibnu Madže, br. 3573.

sallallahu alejhi ve sellem, odgovori: „**Neka je puste koliko jedan pedalj.**“ Ummu Seleme, radijallahu anha, reče: „**Onda će se otkriti njihova stopala.**“ Poslanik, sallallahu alejhi ve sellem, tada reče: „**Neka je puste u dužini podlaktice i neka je ne puštaju duže od toga.**“ (Bilježi Tirmizi i Nesai)⁵

Muškarci ne puštaju odjeću ispod članaka

1. Ebu Hurejre, radijallahu anhu, prenosi da je Poslanik, sallallahu alejhi ve sellem, rekao: „**Dio odjeće koji je ispod članaka bit će u Vatri.**“ (Bilježi Buharija)⁶
2. Ebu Zer, radijallahu anhu, prenosi da je Poslanik, sallallahu alejhi ve sellem, rekao: „**Trojicom Allah neće razgovarati na Sudnjem danu, neće ih pogledati niti će ih očistiti i njih bolna patnja čeka.**“ To je Poslanik, sallallahu alejhi ve sellem, tri puta ponovio pa je Ebu Zer, radijallahu anhu, rekao: „**Poniženi su i propali, ko su oni Allahov Poslaniče?**“ Rekao je: „**Onaj ko pušta svoju odjeću ispod članaka, ko prenosi tuđi govor kako bi sijao smutnju i onaj ko prodaje svoju robu lažno se zaklinjući.**“ (Bilježi Muslim)⁷
3. Abdullah ibn Omer, radijallahu anhu, prenosi da je Poslanik, sallallahu alejhi ve sellem, rekao: „**Puštanje**

⁵ Hadis je vjerodostojan, a bilježi ga Tirmizi, br. 1731., i ovo je njegova verzija, i Nesai, br. 5336.

⁶ Bilježi Buharija, br. 5787.

⁷ Bilježi Muslim, br. 106.

odjeće biva u dojnem dijelu odjeće, košulji i turbanu, ko nešto od toga pusti iz oholosti Allah ga neće pogledati na Sudnjem danu.“ (Bilježi Ebu Davud i Nesai)⁸

Zabranjena odjeća i prostirka

1. Omer ibn el-Hattab, radijallahu anhu, prenosi da je Allahov Poslanik, sallallahu alejhi ve sellem, rekao: **„Ne oblaćite svilu, jer ko je bude oblaćio na ovom svijetu neće je obući na Ahiretu.“** (Muttefekun alejhi)⁹
2. Bera', radijallahu anhu, je kazao: **„Poslanik, sallallahu alejhi ve sellem, nam je naredio sedam stvari: da posjećujemo bolesne, da pratimo dženaze, da kažemo onom ko kihne jerhamukellah. A zabranio nam je svilu, brokat, kasij, istebrek (vrste svile) i crvenu svilu koja se stavlja na sedlo.“** (Muttefekun alejhi)¹⁰
3. Aiša, radijallahu anha, kaže: **„Allahov Poslanik, sallallahu alejhi ve sellem, jednom se vratio s puta, a ja sam zavjesom sa slikama koju sam imala bila zastrla vrata svoje sobe. Kada ju je Allahov**

⁸ Hadis je vjerodostojan, a bilježi ga Ebu Davud, br. 4094., i ovo je njegova verzija, i Nesai, br. 5334.

⁹ Bilježi Buharija, br. 5834., i ovo je njegova verzija, i Muslim, br. 2069.

¹⁰ Bilježi Buharija, br. 5849., i ovo je njegova verzija, i Muslim, br. 2066.

Poslanik, sallallahu alejhi ve sellem, ugledao, strgnuo ju je i rekao: 'Oni koji će dobiti najtežu kaznu na Sudnjem danu jesu oni koji prave likove slične Allahovim stvorenjima.' Pa smo od toga napravili jedan ili dva jastuka.“ (Muttefekun alejhi)¹¹

4. Huzejfe, radijallahu anhu, prenosi da je Poslanik, sallallahu alejhi ve sellem, zabranio da pijemo iz srebrene i zlatne posude i da jedemo iz nje, i zabranio je da oblačimo svilu i brokat i da sjedimo na njima. (Bilježi Buharija)¹²
5. Aiša, radijallahu anhu, je kazivala kako Vjerovjesnik, sallallahu alejhi ve sellem, nije u kući ostavljao ništa što je na sebi imalo sliku krsta, nego je to odmah uklanjao. (Bilježi Buharija)¹³
6. Ebu Hurejre, radijallahu anhu, prenosi da je Poslanik, sallallahu alejhi ve sellem, rekao: „**Imaju dvije vrste džehennemlija, i ja ih nisam vidio (koliko su duboko u Džehennemu): Ljudi koji sa sobom imaju bičeve poput kravljih repova i njima udaraju svijet, i žene, obučene su a gole, same su u zabludi i druge u zabludu odvođe, glave su im poput krivih grba kamile. One neće ući u Džennet, niti će njegov miris osjetiti. A doista se miris**

¹¹ Bilježi Buharija, br. 5954., i ovo je njegova verzija, i Muslim, br. 2107.

¹² Bilježi Buharija, br. 5837.

¹³ Bilježi Buharija, br. 5952.

Dženneta osjeti na tolikoj i tolikoj udaljenosti.“
(Bilježi Muslim) ¹⁴

7. Abdullah ibn Amr ibnul-A'as, radijallahu anhu, kaže: Allahov Poslanik, sallallahu alejhi ve sellem, je na meni ugledao dva ogrtača obojena šafranom (nijansa crvene boje) pa je rekao: „**Doista je ovo odjeća nevjernika zato je nemoj oblačiti.**“ (Bilježi Muslim) ¹⁵
8. Ebu Musa el-Ešari, radijallahu anhu, prenosi da je Poslanik, sallallahu alejhi ve sellem, rekao: „**Svilena odjeća i zlato su zabranjeni muškarcima iz mog ummeta a dozvoljeni su ženama.**“ (Bilježi Tirmizi i Nesai) ¹⁶
9. Halid prenosi i kaže: „**Mikdam ibn Madijekrib je došao kod Muavije i rekao: 'Tako ti Allaha, da li ti je poznato da je Allahov Poslanik, sallallahu alejhi ve sellem, zabranio da se oblači koža divljih zvijeri i da se na njoj jaše?' 'Da.', rekao je Muavija, radijallahu anhu.**“ (Bilježi Ebu Davud i Nesai) ¹⁷
10. Ibn Omer, radijallahu anhu, prenosi da je Vjerovjesnik, sallallahu alejhi ve sellem, rekao: „**Ko na ovom svijetu odjeva uočljivu odjeću (po kojoj se prepoznaje), Allah će ga na Sudnjem danu**

¹⁴ Bilježi Muslim, br. 2128.

¹⁵ Bilježi Muslim, br. 2077.

¹⁶ Hadis je vjerodostojan, a bilježi ga Tirmizi, br. 1720., i ovo je njegova verzija, i Nesai, br. 5265.

¹⁷ Hadis je vjerodostojan, a bilježi ga Ebu Davud, br. 4131., i Nesai, br. 4255, i ovo je njegova verzija.

odjenuti odjećom poniženja, a zatim će je plamenom vatre ispuniti.“ (Bilježi Ebu Davud i ibn Madže)¹⁸

Zabranjeni načini hodanja i oblačenja

1. Rekao je Uzvišeni Allah: ***I, iz oholosti, ne okreći od ljudi lice svoje i ne idi zemljom nadmeno, jer Allah ne voli ni gordog ni hvalisavog. U hodu budi odmjeren, a u govoru ne budi grlat; ta najneprijatiji glas je revanje magarca!*** (Lukman, 18-19)
2. Rekao je Uzvišeni Allah o ženama: ***I neka ne udaraju nogama svojim da bi se čuo zveket nakita njihova koji pokrivaju.*** (En-Nur, 31.)
3. Ebu Hurejre, radijallahu anhu, kaže: „**Poslanik, sallallahu alejhi ve sellem, je zabranio dva načina oblačenja: da se sjedeći uzdignutih koljena umota jednim ogrtačem tako da stidno mjesto ne bude pokriveno, i da se umota jednim ogrtačem tako da mu polovica tijela ostane otkrivena.**“ (Bilježi Buharija)¹⁹
4. Ebu Hurejre, radijallahu anhu, prenosi da je Poslanik, sallallahu alejhi ve sellem, rekao: „**Dok je jedan čovjek nadmeno hodao vukući odjeću, zadivljen samim sobom, začesljane kose, Allah otvori zemlju**

¹⁸ Hadis je vjerodostojan, a bilježi ga Ebu Davud, br. 4030., i Ibnu Madže, br. 3607, i ovo je njegova verzija.

¹⁹ Bilježi Buharija, br. 5821.

ispod njega tako da on tone i propada sve do Sudnjeg dana.“ (Muttefekun alejh)²⁰

5. Ibn Abbas, radijallahu anhu, je rekao: „**Allahov Poslanik, sallallahu alejhi ve sellem, je prokleo muškarce koji oponašaju žene i žene koje oponašaju muškarce.“ (Bilježi Buharija)²¹**
6. Ibn Omer, radijallahu anhu, prenosi da je Allahov Poslanik, sallallahu alejhi ve sellem, rekao: „**Ko oponaša jedan narod on je njihov.“ (Bilježi Ahmed i Ebu Davud)²²**

Negizdanje žena odjećom i ukrasima

1. Rekao je Uzvišeni Allah: ***O Vjerovjesniče, reci ženama svojim, i kćerima svojim, i ženama vjernika neka spuste haljine svoje niza se. Tako će se najlakše prepoznati pa neće napastovane biti. A Allah prašta i samilostan je.*** (El-Ahzab, 59.)
2. Rekao je Uzvišeni Allah: ***A reci vjericama neka obore poglede svoje i neka vode brigu o stidnim mjestima svojim; i neka ne dozvole da se od ukrasa njihovih vidi išta osim onoga što je ionako spoljašnje, i neka vela svoja spuste na grudi svoje.*** (En-Nur, 31.)

²⁰ Bilježi Buharija, br. 5789., i Muslim, br. 2088., i ovo je njegova verzija.

²¹ Bilježi Buharija, br. 5885.

²² Hadis je hasen, a bilježi ga Ahmed, br. 5114., i Ebu Davud, br. 4031.

3. Rekao je Uzvišeni Allah: *A starim ženama koje više ne žude za udajom nije grijeh da odlože ogrtače svoje, ali ne pokazujući ona mjesta na kojima se ukrasi nose; a bolje im je da budu krjeposne. Allah sve čuje i zna.* (En-Nur, 60.)

Davanje pažnje uljepšavanju i čistoći

1. Ebu Ahves prenosi od svoga oca da je rekao: Došao sam Poslaniku, sallallahu alejhi ve sellem, u bijednoj odjeći pa mi je rekao: „**Imaš li ti kakve imovine?**“ „**Da.**“, odgovorio je, a Poslanik, sallallahu alejhi ve sellem, je upitao: „**Koju vrstu imetka imaš?**“ Rekao je: „**Allah mi je dao tako da imam kamila, ovaca, konja i robova.**“ Poslanik, sallallahu alejhi ve sellem, je tada rekao: „**Ako ti je Allah dao da imaš pa neka se vidi trag Allahove blagodati i počasti na tebi!**“ (Bilježi Ebu Davud i Nesai)²³
2. Džabir ibn Abdullah, radijallahu anhu, kaže: „**Jedne prilike nam dođe Allahov Poslanik, sallallahu alejhi ve sellem, pa ugleda čovjeka neurednog i raščupane kose, te reče: 'Zar ovaj nije mogao naći nešto čime bi uredio svoju kosu?'** Također je vidio drugog čovjeka na kom je bila prljava odjeća pa je

²³ Hadis je vjerodostojan, a bilježi ga Ebu Davud, br. 4063., i ovo je njegova verzija, i Nesai, br. 5224.

rekao: 'Zar ovaj nije mogao naći vode kojom bi oprao odjeću?'" (Bilježi Ebu Davud i Nesai)²⁴

Pokrivanje glave

Amr ibn Hurejs, radijallahu anhu, kaže: Kao da gledam u Allahovog Poslanika, sallallahu alejhi ve sellem, kako stoji na minberu a na njemu crni turban čija dva kraja je pustio između pleća. (Bilježi Muslim)²⁵

Šta se kaže prilikom oblačenja nove odjeće i sličnog

Ebu Seid el-Hudri, radijallahu anhu, kaže: Kada bi Allahov Poslanik, sallallahu alejhi ve sellem, dobio novu odjeću, nazvao bi je njenim imenom, košulju ili turban, a zatim bi rekao: „**Allahu, Tebi pripada svaka hvala, Ti si me njome obukao, molim Te za dobro u njoj i dobro u onome za šta je napravljena, a utječem Ti se od njenog zla i zla onoga za šta je napravljena.**“ Rekao je Ebu Nadre: „**Ashabi Allahovog Poslanika, sallallahu alejhi ve sellem, kada bi neko od njih obukao novu odjeću, govorili su: Da je istrošiš i da je Allah zamijeni!**“ (Bilježi Ebu Davud i Tirmizi)²⁶

²⁴ Hadis je vjerodostojan, a bilježi ga Ebu Davud, br. 4062., i ovo je njegova verzija, i Nesai, br. 5236.

²⁵ Bilježi Muslim, br. 1359.

²⁶ Hadis je vjerodostojan, a bilježi ga Ebu Davud, br. 4020., i ovo je njegova verzija, i Tirmizi, br. 1768.

Kako se dovi onom ko obuče novu odjeću

Ummu Halid bint Halid kaže: „**Allahovom Poslaniku, sallallahu alejhi ve sellem, je donesena odjeća, a u njoj je bio jedan crni ogrtač pa je upitao: 'Šta kažete koga da odjenemo ovim ogrtačem?' Prisutni su zašutjeli a Poslanik, sallallahu alejhi ve sellem, je rekao: 'Dovedite mi Ummu Halid!' Pa sam dovedena Poslaniku, sallallahu alejhi ve sellem, pa me je svojom rukom obukao tim ogrtačem i rekao: 'Da ga iznosaš i poharaš!', rekao je to dva puta.**“ (Bilježi Buharija)²⁷

Način kako se obuva obuća

Ebu Hurejre, radijallahu anhu, prenosi da je Allahov Poslanik, sallallahu alejhi ve sellem, rekao: „**Kada se neko od vas obuva neka počne desnom nogom, a kada se izuva neka počne lijevom, tako da desna bude prva noga koja se obuva, a zadnja koja se izuva.**“ (Muttefekun alejh)²⁸

Predaje o prstenju muškaraca i gdje se nose

²⁷ Bilježi Buharija, br. 5845.

²⁸ Bilježi Buharija, br. 5856., i ovo je njegova verzija, i Muslim, br. 2097.

1. Ebu Hurejre, radijallahu anhu, prenosi od Allahovog Poslanika, sallallahu alejhi ve sellem, da je zabranio zlatni prsten. (Muttefekun alejh)²⁹
2. Enes, radijallahu anhu, prenosi da je prsten Allahovog Poslanika, sallallahu alejhi ve sellem, bio od srebra kao i njegova zijenica. (Bilježi Buharija)³⁰
3. Enes ibn Malik, radijallahu anhu, prenosi da je Allahov Poslanik, sallallahu alejhi ve sellem, stavio srebreni prsten na desnu ruku, u njemu je bila abesinska zijenica koju je okretao prema dlanu. (Bilježi Muslim)³¹
4. Enes, radijallahu anhu, kaže: Poslanik, sallallahu alejhi ve sellem, je naredio da mu se napravi prsten a zatim je rekao: „**Izradili smo prsten i na njemu gravirali natpis pa neka niko ne gravira prema njemu.**“ Rekao je Enes, radijallahu anhu: „**Doista ga vidim kako se sija na njegovom malom prstu.**“ (Bilježi Buharija)³²

Šta je dozvoljeno ženama nositi od zlatnih ukrasa

1. Ibn Abbas, radijallahu anhu, kaže: „**Prisustvovao sam bajram namazu sa Poslanikom, sallallahu alejhi ve sellem, pa je klanjao prijte hutbe, a zatim**

²⁹ Bilježi Buharija, br. 5864., i Muslim, br. 2089.

³⁰ Bilježi Buharija, br. 5870.

³¹ Bilježi Muslim, br. 2094.

³² Bilježi Buharija, br. 5874.

je otišao ženama te su bacale burme i prstenje u Bilalov ogrtač.“ (Bilježi Buharija)³³

2. Aiša, radijallahu anha, prenosi da je jedne prilike posudila od Esmе ogrlicu, a zatim je izgubila. Poslanik, sallallahu alejhi ve sellem, je poslao čovjeka da je traži. Čovjek je našao oglicu, ali ih je u tome zatekao namaz, a nisu sa sobom imali vodu. Klanjali su i zatim se požalili Allahovom Poslaniku, sallallahu alejhi ve sellem, pa je Allah objavio ajet o tejemumu. (Muttefekun alejh)³⁴

Skromnost u odjeći i postelji

1. Ebu Burde, radijallahu anhu, prenosi da im je Aiša, radijallahu anha, iznijela odijelo i grubi ogrtač i rekla: **„Duša Allahovog Poslanika, sallallahu alejhi ve sellem, je uzeta, a bio je odjeven u ovo dvoje.“** (Muttefekun alejh)³⁵
2. Aiša, radijallahu anha, kaže: **„Postelja Allahovog Poslanika, sallallahu alejhi ve sellem, na kojoj spava je koža ispunjena palminim vlaknom.“** (Bilježi Muslim)³⁶

³³ Bilježi Buharija, br. 5874.

³⁴ Bilježi Buharija, br. 336., i ovo je njegova verzija, i Muslim, br. 367.

³⁵ Bilježi Buharija, br. 5818., i ovo je njegova verzija, i Muslim, br. 2080.

³⁶ Bilježi Muslim, br. 2082.